

## Naqqiut

Siunnersuummut 10. august 2018 ullulerneqartut taarsiut

### Tunngavilersuut

Siunnersuutip kalaallisuuani § 18, imm. 4-mi aamma § 46 a, imm. 1, nr 1-mi oqaasertaliussanik allannguisoqarpoq.

### **Uunga siunnersuut: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaata allanngortinneqarnissaa pillugu Inatsisartut inatsisaat nr. xx, xx. xxx 2018-imeersoq**

(Aningaasaqarnermut Naalakkersuisoq)

### Saqqummiussissut

(Aningaasaqarnermut Naalakkersuisoq)

### Siullermeerneqarnera

Naalakkersuisut sinnerlugit Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaata allanngortinneqarnissaa pillugu siunnersuut matumuuna saqqummiutissavara.

Siunnersuummut misilittakkat Inatsisartut inatsisaata 2016-imi akuerineqarneranili misilittagarineqalersut aamma tamatuma kingorna ineriartorneq, tunngavigineqarput. Taamaattumik aalajangersakkani assigiinngitsuni arlalinni annikitsunik teknikkimullu tunngasunik arlalinnik allanngortitsinissaq matumani pineqarpoq.

Aningaasarsianit akileraarutit pillugit Inatsisartut Inatsisaanni ilanngaasiinnginnermi akileraarutitut aqqissuussinerup, aamma Namminersorlutik Oqartussat sinnerlugit mittarfiliornert pineqartunut ilaatiilerlugit annertusineqarnissaa, Inatsisartut 2017-imi ukiaanerani akueraat. Tamanna maannakkut mittarfiit ilusiligaanerata ineriartortinneqarnissaa pillugu oqallinnerit ingerlasut eqqarsaatigalugit pivoq. Maleruagassat atuuttut malillugit aatsitassarsionernit ilanngaasiinnginnermi akileraarutit Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut tutsinneqartussaapput. Taamaattumik ilanngaasiinnginnermi akileraarutit allat aamma aningaasaateqarfimmut tutsinneqartariaqartut siunnersuutigissallugu pissusissamisoorpoq. Taamaaliornermi isertitat taakkua inuiaqatigiit aningaasaqarneranni ineriartortitsinermut pitsaasumik atorneqassapput aammalu aningaasaqarnermi atuivallaalernissap aarlerinaateqarnera annikillissalluni, tamannalu aningaasaateqarfiup siunertaanut naapertuuppoq.

Pisortani ataatsimoorussamik IT-mut aaqqissuussaaneermik, kommunit aamma Namminersorlutik Oqartussat akimorlugit ataatsimoorluni pisiniarneermik, ingerlatsinermik aammalu IT atorlugu periaatsinik ineriartortitsinermik isumaginnissinnaasumik, ineriartortitsinissamik pisariaqartitsisoqarsinnaasoq, pisortani ataatsimoorussamik aningaasaqarnermut aqutsinermullu paasissutissanut periaatsimik nutaamik piareersaalluni naleqqussaallunilu suliaqarnerup takutippaa. Siunnersuummi matumani tamatut aaqqissuussinissamut inatsisini tunngavissat pisariaqartut qulakkeerneqarput. Aaqqissuussaaneermi suliassat, aqutsineq, aningaasalersuineq il.il. nalunaarummiitinneqassasut naatsorsuutigineqarpoq. Nalunaarut kommunit aamma Namminersorlutik Oqartussat akornanni isumaqatigiissut tunngavigalugu suliarineqassaaq. Isumaqatigiissummi tassani aaqqissuussaaneerup pilersinneqarnerani ingerlanneqarneranilu aningaasartuutit agguarneqarnissaat nassuiarneqassasoq naatsorsuutigineqarpoq.

Paasinarsisimavoq Inatsisartut inatsisaanni §§ 2-5-imi missingersuutini inissisimanerup naatsorsorneqartarnera pillugu maleruagassat periaatsitigut naleqqutinngitsunik pingaaruteqartunik imaqartut, taakkua siunertarineqartut atorneqarnissaat ajornakusuulersinneqarluni. Maleruagassat pisortani aningaasaqarnermik aqutsinermut pingaaruteqartorujussuummata Inatsisartut inatsisaanni §§ 2-5, 1. januar 2022 tikillugu atorunnaarsinneqassasut siunnersuutigineqarpoq. Tamatuma tungaanut qulaajaanermik suliaqarnek, maleruagassat allanngortinneqarnissaat pisariaqartinneqarnersoq aammalu taakkununga siunnersuuteqarnissaq pisariaqarnersoq paasinarsisitsisussaq, aallartinneqassaaq. Naatsorsuutigineqartut akerlianik paasinarsissappat, periaatsitigut naleqqutinngitsut taakkua maleruagassat allanngortinnagit aaqqiivigineqarsinnaasut, Naalackersuisut maleruagassanik nalunaarummi atuutsitsilernissaannut periarfissaq ammaanneqassaaq. Taamaassappat kommunit piffissaqartitsilluartumik akuutinneqassapput, taamaalillutik taakkua maleruagassanut naleqqussarnissaq angumerisinnaassallugu.

Naggataatigut inatsisissamut siunnersuutit aammalu nassuiaatit taakkununga atasut innersuussutigissavakka.

Taamatut oqaaseqarlunga Naalackersuisut sinnerlugit siunnersuutit marluusut taakkua Inatsisartuni suliassanngortippakka.